



Republika e Kosovës – Republika Kosova  
Paneli Zgjedhor për Ankesa dhe Parashtrësia  
Izborni Panel za Žalbe i Predstavke

Anr.453/2021

**Paneli Zgjedhor për Ankesa dhe Parashtrësia (PZAP)**, në panelin e përbërë nga gjyqtarët: Milena Đerić kryesuese, Afijete Sada - Glllogjani dhe Ferki Xhaferi, anëtarë, me pjesëmarrjen e zyrtarit të lartë ligjor Kudret Hasani, duke vendosur përkitazi me ankesën subjektit politik Lëvizja Vetëvendosje, me seli në Prishtinë, si dhe ankesën e Birn dhe Internews Kosova (IKS) paraqitur kundër subjektit politik Partia Demokratike e Kosovës (PDK), me seli në Prishtinë, për shkak të shkeljes së Kodit të Mirësjelljes për subjektet politike - Thyerja e heshtjes zgjedhore për Zgjedhjet e Parakohshme për Kuvendin e Republikës së Kosovës, të mbajtura me datën 14.02.2021, në seancën e panelit të mbajtur me 16.02.2021, mori këtë:

## V E N D I M

**I. PRANOHEN** të bazuara ankesa A.nr.453/2021 e datës 14.02.2021, e ushtruar nga subjekti politik Lëvizja Vetëvendosje, si dhe ankesa A.nr.508/2021 e datës 15.02.2021, e ushtruar nga Birn dhe Internews Kosova (IKS), ndërsa subjektit politik Partia Demokratike e Kosovës (PDK), me seli në Prishtinë, i shqiptohet gjobë në lartësi prej 3,500.00 € (tremijë e pesëqind), në emër të shkeljes së Kodit të Mirësjelljes për subjektet politike – Thyerja e heshtjes zgjedhore.

**II. DETYROHET** subjekti politik Partia Demokratike e Kosovës (PDK), me seli në Prishtinë, që gjobën e shqiptuar si në pikën -I-, të dispozitivit të këtij vendimi, ta paguajë në afat prej 15 ditëve, nga dita e marrjes së këtij vendimi, nën kërcënim e shqiptimit të dënimit shtesë.

## A r s y e t i m

Me datën 14.02.2021 PZAP-i ka pranuar ankesën A.nr.453/2021 nga subjekti politik Lëvizja Vetëvendosje (LVV) qendra në Pejë, si dhe ankesën A.nr.508/2021 të datës 15.02.2021 të parashtruar nga Birn dhe Internews Kosova (IKS), me të cilën pretendon se subjekti politik PDK ka thyer heshtjen zgjedhore duke i dërguar qytetarëve SMS rreth aktiviteteve të tyre elektorale duke kërkuar nga qytetaret të dalin të votojnë emrin e dërguesit të mesazhit ku është shënuar akronimi i subjektit politik PDK. Parashtruesi i ankesës thekson se SMS janë dërguar në ditën e zgjedhjeve në heshtje zgjedhore në të cilat theksohet” *Kosovës i duhet rimëkëmbje. Për secilin prej nesh Rimëkëmbja ka kuptim të veçantë. Bashkohu me ne me 14 shkurt . Voto PDK me numër 134*” ku kjo mund të dëshmohet edhe me fotografi ku vërehet ora e saktë e dërgimit. Parashtruesi i ankesës thekson se subjekti politik PDK ka thyer heshtjen zgjedhore të sanksionuar me nenin 36 par. 1 pika b) të LZP-se dhe nenin 8 paragrafi 1 pika c) të Rregullës Zgjedhore 13/2013 të KQZ-se dhe si provë ka bashkangjitur një fotografi të printuara lidhur me rastin në fjalë.

PZAP-i, në kuptim të nenit 7 par.1 të Rregullave dhe Procedurave të PZAP-it e informoi subjektin politik PDK lidhur me ankesën e paraqitur nga subjekti politik Lëvizja Vetëvendosje.

Në përgjigje në ankesë të datës 14.02.2021, subjekti politik PDK, i ka kundërshtuar pretendimet e ankuesit duke theksuar se ky subjekt politik nuk ka dërguar asnjë SMS tek qytetaret ku bëhet thirrje për votimin e këtij subjekti politik dhe se ky SMS mund të jete një manipulim nga një pale tjetër.

Paneli, në bazë të nenit 8 paragraf 3, të Rregullave dhe Procedurave të PZAP-it, ka vendosur të bashkon ankesat e lartcekura dhe ti trajton si një ankesë, për shkak të natyrës së njëjtë të rasteve dhe pretendimeve, dhe për të gjitha të vendos me një vendim për shkak të efikasitetit dhe ekonomizimit të procedurës.

Paneli, pasi që shqyrtoj të gjitha shkresat e lëndës në kuptim të nenit 117 par. 2 të LZP-së, gjeti se:

#### **Ankesat janë të bazuara.**

Paneli pas shqyrtimit të shkresave, e posaçërisht nga foto e ofruara si provë nga parashtruesit e ankesave, e cilat gjenden në shkresat e lëndës, në mënyrë të padyshimtë, ka konstatuar se subjekti politik PDK respektivisht mbështetësit e subjektit politik në fjalë përmes SMS ka/kanë bërë thirrje tek qytetaret e Kosovës që të votohet gjatë ditës së votimit në ditën e heshtjes zgjedhore, duke promovuar subjektin politik Partia Demokratike e Kosovës (PDK), veprim ky që është në kundërshtim me nenin 36.1 pika b) e LZP-së, e cila përcakton *“Njëzet e katër (24) orë para hapjes së Qendrës të Votimit për hedhjen e votës, e deri në mbylljen e tyre, subjekteve politike, mbështetësve ose kandidatëve të tyre u ndalohet bërja e fushatës në çfarëdo mënyre”*.

Paneli, vendimin e tij e ka mbështet në dëshmi të qarta dhe bindëse siç përcaktohet me nenin 117 par. 3 të LZP-së, prandaj pretendimet në përgjigje në ankesë nuk u cilësuan me ndikim në meritat e lëndës.

Parashtrimet në përgjigje në ankesë, se subjekti politik PDK nuk ka dërguar asnjë SMS tek qytetaret dhe se e njëjta mund të jete e manipuluar nga një pale tjetër, paneli e vlerëson si jo relevante, për faktin se mesazhet janë dërguar në emër dhe për llogari të subjektit politik në fjalë ku nga foto e bashkangjitur në ankesë shihet çartë se SMS me akronim të subjektit politik PDK gjatë ditës së votimit me datën 14 shkurt 2021 duke e promovuar subjektin e tyre politik dhe në interes të këtij subjekti politik ju bëhet thirrje qytetarëve të Kosovës që të dalin dhe të votojnë, veprime këto që janë në kundërshtim me dispozitat ligjore të Nenit 36 .1 pika b) i LZP-së, ku përcaktohen veprimet e ndaluara para procesit të votimit nga ana e subjekteve politike. Ky përfundim ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që veprimet e subjekteve politik të jenë në një atmosferë të tolerancës demokracisë, paqes dhe respektit për sundimin e ligjit.

Paneli, me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalët, shkallën dhe peshën e shkeljes, pjesëmarrjen e subjekti politik në zgjedhjet e mëparshme që konsiston në faktin së subjekti politik PDK, ka qenë e njoftuar me obligimet dhe përgjegjësit gjatë procesit të fushatës, shkeljet e rregullave dhe Ligjeve zgjedhore në fuqi që ka bërë subjekti në fjalë në këto zgjedhje dhe në zgjedhjet e mëparshme në Kosovë që do të thotë se i njëjti është i njoftuar me Rregullat zgjedhore si dhe shumën e fondeve që ka marrë subjekti politik prej Buxhetit të Republikës së Kosovës, për zhvillimin e aktiviteteve lidhur me fushatën zgjedhore. Paneli po ashtu me rastin e përcaktimit për lartësinë e gjobës ka marrë parasysh edhe përgjigjen në ankesë të subjektit politik.

Paneli vlerëson se kjo mënyrë e të bërit fushatë qoftë drejtpërdrejt nga subjekti apo në emër dhe për llogari të subjektit nga mbështetësit e subjektit, cenon lirinë e përcaktimit të qytetarit duke e shqetësuar dhe duke tentuar që të ndikoj tek i njëjti për përcaktimin e tij për të votuar. Subjekti në emër dhe për llogari për të cilin është bërë thirrja për të votuar asnjëherë publikisht nuk ka mohuar se kjo fushatë është e drejtuar nga ana e tyre apo përkrahësve të tyre, por reagimi i vetëm ka qenë përmes përgjigjes së shkurtër në ankesë dërguar në Panel.

Përveç të cekurave më lartë Paneli, me rastin e vendosjes i vlerësoi edhe të gjitha pretendimet e subjektit politik Partia Demokratike e Kosovës, në kuadër të pretendimeve të theksuara në përgjigje në ankesë, mirëpo të njëjtët ishin jo relevante dhe pa ndikim për një vendimarrje ndryshe nga ajo që është vendos.

Nëse subjekti të cilit i është shqiptuar dënimi nuk e paguan të njëjtin brenda afatit të përcaktuar në dispozitiv të tij, atëherë në pajtim me nenin 120.2 të LZP-së, subjektit do ti shqiptohet dënim shtesë. Ky paralajmërim për dënim shtesë është përcaktuar me nenin 120.2 të LZP, i cili përcakton: “ *Dështimi për të paguar dënimin apo për t’ju bindur një urdhërese të PZAP-it brenda periudhës kohore të saktësuar në vendimin e PZAP-it, është një shkelje tjetër e këtij ligji që mund të sanksionohet me dënim shtesë nga PZAP-i.*”, ashtu siç është vendosur në pikën II të dispozitivit të këtij vendimi.

Paneli në kuptim të nenit 120.1, pika c), dhe nenit 118.1, të LZP-së, vendosi si në dispozitiv të këtij vendimi.

### **Paneli Zgjedhor për Ankesa dhe Parashtrës**

Anr. 453/2021 më datën 16.02.2021

**Kryesuese e Panelit**

Milena Đerić



**Këshilla Juridike:** Kundër këtij vendimi nuk është e lejuar ankesa sipas nenit 118 par. 4 të LZP-së,